

Unda da fugitivs tema en il parlament grischun

Ura da dumondas dal cussegl grond

■ (anr/fa) Eran ils 14 migrants ch'èn vegnids arrestads dacurt a Campocologno be in cas singul? Il president da la regenza, Christian Rathgeb, ha declerà co che la situaziun sa preschenta actualmain en Grischun. «Sunter che la ruta si dal Balcan è vegnida serrada prendan noss pajais vischins mesiras cunter in eventual augment dals fugitivs si da l'Italia», ha constatà *Reto Cramer* (pcd, Belfort) mesemna a chaschun da l'ura da dumondas. L'Austria prevesia eventualmain da far controllas pli rigurusas al Brenner e ch'er la Frantscha pudess puspè bloccar il cunfin per ils fugitivs, ha'l ditg, «en quel cas creschiss il squitsch sin la Svizra e spezialmain sin il Grischun sco chantun da cunfin fermamain.» Cramer ha vuli savair cun tge scenario che la regenza grischuna fetschia quint e sch'ella haja prendi mesiras.

Almain tantas dumondas d'asil sco l'onn passà

Ins na possia sin basa da la situaziun da migraziun actuala betg far prognosas, ha ditg cusseglier guvernativ *Christian Rathgeb*, «il Secretariat per migraziun fa quint cun medem bleras dumondas d'asil sco l'onn passà, cun circa 40 000.» Sch'il cunfin al Brenner vegniss serrà na fissi tenor Rathgeb betg d'excluder ch'ils migrants tshernissan la ruta tras la Svizra per arrivar en Germania, e qua fissan per tutgads surtut il Tessin, il Vallais ed er il Grischun. Sch'il cas dals 14 migrants ch'èn vegnids arrestads dacurt en il Puschlav è in cas unic u sche cuntrabandists da personas han empruvà ina nova ruta n'è tenor il president da la regenza anc betg enconuschent. «Igl è bain pussaivel che nus stoppian far quint cun ulteriurs migrants ch'entran en Grischun.» Per l'accoglientscha dals migrants e per



A l'avis dals experts èsi pussaivel ch'ina part dals migrants prendian pli savens la ruta si da las vals dal sid grischunas per arrivar en Germania.

eventualas proceduras d'asil è respunsabla la confederaziun. «Sia lezia è era dad infurmar chantuns e vischnancas co ch'ella prevesa da schliar la situaziun cun in'eventuala unda da migrants», ha declerà Rathgeb. El ha ditg che la regenza grischuna pretendia da la confederaziun ch'i vegnia rinforzà sper il cunfin tessinai er il cunfin al sid dal Grischun. «Sche l'Austria e la Frantscha serrassan ils cunfins pretendessan nus ensemen cun ils respunsabels dal Tessin e dal Vallais che la confederaziun examinass medemas mesiras che quels dus pajais vischins.»

Sustegn chantunal per l'ospital Surselva

«Tge consequenzas per il servetsch da salvament e per il providiment da sanadad en Surselva ha il midament da la centrala da cas urgents 144 da Glion a Cuira per Bumaun 2018», ha dumandà deputà *Lorenz Alig* (pld, Glion). Ils ospitals regiunals sajan tenor lescha obligads da procurar per lur regiuns d'ospital per in servetsch da cas urgents e per transports da malsaus, ha ditg Rathgeb, «l'ospital regiunal da la Surselva survegn per quel adiever sia part dal credit per il servetsch da transports da malsaus e disgraziads

ch'il cussegl grond ha deliberà per mauns dals ospitals grischuns. Dapi Bumaun 2016 è en vigur en Grischun la lescha davart la protecziun da la populaziun. A la dumonda dad *Anna-Margreth Holzinger* (pld, Schiers), sche las vischnancas sajan preparadas per questas novas lezias ha dà Rathgeb resposta positiva: «Sut la direcziun dal manader da l'uffizi per militar e protecziun civila ed en cooperaziun cun l'uffizi per gaud e privels natirals sco era l'Assicuranza d'edifizis dal Grischun han lieu fin ils 21 da zercladur nov arranschaments d'infurmaziun regiunals.» En quell'ocasiun vegnan infurmadadas las au-

toritads communalas ed ils cumandants da pumpiers e da la protecziun civila davart las incumbensas, las analisas dal privel per mintga vischnanca e da la scolaiziun dals responsabels. A far las analisas dal privel cumenzan ins a partir d'avust, en tshintg onns duess avair mintga vischnanca ina da quellas analisas.